

跟着诗词歌赋游东海百里文廊

□来其 编选



留客住

宋·柳永

偶登眺。凭小阁、艳阳时节，乍晴天气，是处闲花芳草。遥山万叠云散，涨海千里，潮平波浩渺。烟村院落，是谁家绿树，数声啼鸟。
旅情悄。远信沉沉，离魂杳杳。对景伤怀，度日无言谁表？惆怅旧欢何处？后约难凭，看看春又老。盈盈泪眼，望仙乡，隐隐断霞残照。

盐仓



马岙

清·朱绪曾

大舟小舟山吐岚，单奇洞里攀金柑。
当年设伏章延廉，指点烟墩父老谈。

马岙



赠复翁堂

清·胡邦器

境入翁洲触处佳，迁民痛忆旧生涯。
奏闻京国三千里，诏复闾阎十万家。
海上有天重日月，山中无地不桑麻。
丈夫功绩应难泯，特匾高堂永岁华。

小沙




兴善寺

清·朱绪曾

曾闻凤舞到钱塘，兹地山形足顿颡。
兴善教忠非浪语，有人蹈海殉君王。

双桥



投诗泄潭

宋·刘伋

未跃天衢卧寂寥，碧潭流溢海山腰。
埋藏头角虽多日，鼓动风雷在一朝。
既若有心成变化，岂能无意泽枯焦。
神踪许为苍生起，愿击香车上九霄。

白泉



游隆教寺

明·张苍水

云林次第望中收，碧涧清泉曲曲流。
山势有情留古寺，海潮无意到孤洲。
素冠却许黄冠伍，芳草浑同衰草愁。
自觉行踪犹靡落，五湖烟雨钓鱼舟。

干览



题回峰寺

宋·王安石

山势欲压海，禅扃向北开。
鱼龙腥不到，日月影先来。
树色秋擎出，钟声浪答回。
何期乘吏役，暂此拂尘埃。

岑港



翁洲书院

明·陶恭

三神渺漠少通津，争似此山城郭邻。
蓬岛楼台嘘作蜃，桃源风景别生春。
金人斫柱痕犹在，羽士烧丹鼎已尘。
瑶草玉芝闲自拾，何须方外觅元真。

昌国